

Viel liebe Gruesse

Uil lieber grüsse / süsse /
sich erheben / streben /
frölich / zölich /
yetten / treten jn das phat /
drat / frü und spat
hört man dringn' / singn' klingn' /
voglin jnden owen. /

Durch helle döne / schöne /
jnden strauhen / rauhen /
esten / glesten /
fliegen / kriegen /
widerstreit / breyt / angerweyt /
sol man grünlich / künlich / sünlich /
kurczlich ane schowen. /

Wjnder kalt / ungestalt / dein gewalt / ist enspalt
von den süssen lüfften /
liechten summ' / Ane kummer / wil ich tummer / Als ein frumm' /
gewden und güffte /

Grüner kle / iagt den snee / jarlag me / jnn den see /
wilder meres flüte /
nachtigalle / droschel schalle / lerchen halle / uns geualle /
für des ofens güte /

Dje blümen göle / hele /
hübsch geuerbet / gërbet /
prawne / schawne / plawe / grawe /
mangerley / may /
dein geschray /
sich florieret / zieret / gieret /
kösstlicher gelüsste /

Vnd hübsche wësly / grësly /
sich entliessen / spriessen /
hüglich / tüglich / plüde / früde /
violsprancz / glantz / firlafantz /
Aller pame / zame / game /
zier auss kalder früste. /

Stauden stock / machet schock / rauhen rock / als ein bock /
löblichen bedeckt /
swartzer doren / weysser koren / gar verloren ist der zoren /
den der winder wecket /

Küler brunn / warme sün / geit uns wunn / gail dich nunn /
hinden auss dem kloster /
bey dem Reyne / jndem scheine / als ein veine / bülbgyne /
rayen nach den ostern /

Dje swammen stupffen / lupffen /
auss der erde / herde /
würmly / türmly /
wachen / machen /
newen slauch / gauch / lock uns auch /
durch die haide / rayde / ir mayde /
sücht der stauden winckel

Da well wir kosen / losen / mit beslossen / gossen /
warmen / armen /
lieplich / dieblich /
jnn dem busch / dusch / mündlin kusch /
ob die raine / klaine / saine /
mir emblösst ein schinkel /

An ain knye / ich wer hye / des nit lye / und tet wie
ich das gefügen kunde /
zu ir rucken / freuntlich smucken / lieplich drucken / biegen bucken
ob sy mir des gunde /

So wer quitt / was ich litt / hielt sys mit / diesen stritt /
müsst ich überwinden
sunder klifen / tasten grifen / mänigen lifen / lust vertrifen /
bleiben bey dem kinde / -